

制

義

叢

話

制義叢話卷之二十二

福州梁章鉅撰

命題試士漢時卽有之漢書晁錯傳云文帝親策賢良能直言極諫者對策者百餘人是也然是試以時務非試以文辭唐書楊綰傳云進士科起於隨大業中通鑑綱目遂據之以爲文辭試士之始至命題之制則永明策秀才之題見於昭明文選詩賦之題備載於文苑英華惟今人所標題目二字則於古無據陔餘叢考謂始見北史念賢傳魏孝武作行殿初成未有題目詔侍臣各名之念賢擬以圓極帝曰正與朕意同此指題榜之字非今人所謂題目惟孔穎達尚書大禹謨正義云史將錄禹之事故爲題目之詞正今人題目二字所自仿特非指試士之題耳若北齊文宣帝令辛術選百官時參選者二三千人術題目士子人無怨讟此則品

題之稱又與今試場所謂題目無涉也

以經書命題者蓋始於宋宋史甯宗慶元四年以經義多用套類父子兄弟相授致天下士子不務實學遂命有司六經出題各於本經摘出兩段文意相類者合爲一題以杜挾冊售偽之計按明太祖洪武三年開科以大學古之欲明明德於天下者二節孟子道在邇而求諸遠一節合爲一題問二書所言平天下大指同異此卽沿宋時之法又春秋經有脫母題至我朝順治九年始禁不用又有合題至乾隆元年亦停止並詳見學政全書及科場條例中

前明洪武二十年丁卯科應天鄉試首場首題爲老者安之三句次題爲興於詩三句三題爲克己復禮爲仁三句皆出論語彼時原無定式也至我朝順治二年始定四書題第一題用論語第

二題用中庸第三題用孟子如第一題用大學則第二題用論語
第三題仍用孟子 按此令載科場條例中奉行已久乃近閱邸
抄中有一案云道光庚子山西鄉試首題爲德潤身心廣體胖次
題爲體羣臣也子庶民也兩題並用大學中庸而無論語題實與
科場條例不符旋經主考檢舉監臨奏參部議照違制律擬革職
留任亦可謂寬典矣

康熙五十二年奉

上諭四書五經皆聖人講理明道之書貫始徹終無非精意近見
鄉會試俱擇取冠冕吉祥語出題每多徇構倖獲致讀書通經之
士漸少今後開中題目應不拘忌諱庶難預作揣摩實學自出欽
此又部議覆準主考房官係中式年久之人於本身中式題目多
不記憶且人數既多應回避之題亦復不少徒爲紛紜嗣後主考

房官本身中式經書題目均毋庸迴避又乾隆三年議準考試命題固取發明義理而亦以展才思遇有人文最盛之區若命題專取冠冕士子蹈常襲故或無從潛發巧思開出截搭題則旁見側出亦足規文心之變化第必須意義聯屬血脈貫通若上下絕不相蒙恣意穿鑿割裂語氣殊屬傷雅嗣後學政出題宜以明白正大爲主卽開出長搭題亦必求文義之關通毋蹈割裂之陋習則既不詭於義理而亦不閤其性靈庶文章之能事曲盡而課士之法亦周詳矣又乾隆四十年議準程景伊奏稱覆勘各省試卷見試題漸趨佻巧割裂其最甚者如四川頭場試題又日新康誥曰六字連上牽下全無義理旣不足以見學問書卷而稍知機法者更可僥倖獲售請飭部禁止從之又乾隆五十二年議準覆勘大臣奏稱經書重句命題依本文次序在前者不必加注在後

者題明某章某節則士子不難遵守而經文不嫌偏廢應如所奏將原例內雷同句法不得命題一條刪除敬維

訓諭周至功令嚴明乃掌文衡者流仍不免有偏規錯矩之事抑獨何歟

日知錄云天啟四年應天鄉試題今夫弈之爲數一節以魏忠賢始川事也浙江鄉試題君之視臣如手足則臣視君如腹心以杖殺工部郎萬燝也七年江西鄉試題瞞瞞乎不可尙已其年監生請以忠賢建祠國學也崇禎三年應天鄉試題舉直錯諸枉能使枉者直以媚奄諸臣初定逆案也此皆可以開帝聰而持國是者時當季葉而河水鶴鳴之義猶存於士大夫可以想見先朝之遷化若崇禎九年應天鄉試春秋題宋公八曹以曹伯陽歸以公孫疆比陳啟新是以曹伯陽比皇上非所宜言大不敬天啟七年順

天鄉試書經題我二人其貞以周公比魏忠賢則又無將之漸亦見之彈文者也

制義科瑣記云萬曆二十三年乙未會試前一日有舉子夢試題係晉元帝恭默思道七字而題紙爲易水生奪去後試題乃司馬牛問仁章蓋晉姓司馬而元帝爲牛金子合之則司馬牛也其恭默思道又合詁言意是科會元湯賓尹則固易水生也亦奇而巧矣

堅瓠集云萬曆壬子蘇郡守鄞縣趙世祿錄科試題出康誥曰如保赤子節一書吏某稟曰今日錄科題有不中字請易之遂易夫八不言言必有中二句秋榜發郡士得雋者三十二人周忠介順昌姚文毅希孟王遵義仲聖沈應明陸康櫻熊秉鑑皆是科所取士明三百年得士之盛未有如此科者也

又云天啟中崔魏用事爭傳其有不軌之志北直學使者考核宛平童子題出忠矣至清矣牌已書命教官傳諭一教官請曰此題還求大宗師更易學使者聲色俱厲曰爾以是題爲不佳乎教官從容對曰題甚佳但其中包崔子弑齊君一段不見高啟愚以舜亦以命禹爲南臺抨擊乎學使者改容謝之

揆敘隙光亭雜記云本朝江南鄉試不以大學命題以明崇禎壬午科題爲定而後能靜三句明南京鄉科盡於此也聞廣東鄉試亦然如命大學題則貢院被火或主試者有禍患而尤忌聖經一章云

履園叢話云余嘗論考試題目低兩格寫文則頂格皆習焉不察題目是聖經賢傳時文乃發明聖經賢經義者何以反高兩格試看十三經注疏豈有注高於經疏高於注者乎卽本紀列傳志表題

目亦無有低兩格者不知當時何人定此式樣也 按錢梅溪此
言甚辨而不知注疏是經紀傳是史詩文是集各自爲例不必相
蒙集莫古於昭明文選其每篇題目卽低兩格卽古來各子部中
每篇題目亦無不低二格者四書文式樣卽沿其例又何疑焉
詞林典故云順治二年定前場題目將經書分段書籤公同粘掣
如論語分爲十段主考掣至某書某段卽令房官於本段內各擬
一題仍書籤候掣出者用之又康熙七年題准考試官將六身取
中四書五經題目擬出者降四級調用又康熙十八年議準場內
擬題四書掣定幾章每題每人各擬一道五經掣定幾章每題每
人各擬十道俱送正副考官寫入箒當堂粘掣 按此例今久不
行亦可想見立法之初嚴密如此

堅瓠集云順治庚寅吳中郡守王光晉府試時同知石映星攝長

邑事與之同試出題首題乃雍也可使南面仲弓問子桑伯子命吏書牌早驗王見不寫註字曰這許多何不竟寫一行石曰此足掛題王曰石老爺考童子竟出蠻子家題目罷了何必要出喀題衆爲匿笑

陸次雲北墅奇書云順治中山左有李神仙者游行京邸庚子北直鄉試有兩生密詢試題者李笑曰君等皆道德仁義中人也奚以下爲題出乃志於道全章後二人皆中式辛丑會試又有以試題問者李曰五後四可後首題乃知止而后有定全節二題夫子之文章全節三題易其田疇二節

熙朝新語云順治丁酉江南鄉試得人最盛如張玉書馬世俊陸燦趙炳皆一時名士題爲子貢曰貧而無諂全章外閒下第者端加誹語有黃鸞兒詞一首以譏諷場務云命意在題中輕負士重

富翁詩云子曰全無用切磋欠工往來要通其斯之謂方能中告
諸公方人子貢原是貨殖家風其事

上聞遂興大獄兩主考及十八房官皆寘重典舉人除伏誅外尙
革去二十餘人道光乙未順天鄉試

欽命題爲未若貧而樂兩句亦革去數人不到覆試者幾數十人
不知此章內出題何以必有事端抑適逢其會耶

制義科瑣記云康熙二年癸卯順天鄉試以經題訛錯吏科給事
中楊鼎疏曰凡闈中試題例皆本經同考官所擬今春秋經題則
同考官羅繼謨擬進者也乃春秋第四題經係邾子而題訛邾人
夫以春秋本經閱春秋房而題有訛錯其人固已疎矣且此第四
題卽己亥會試之第二題也已亥是題亦曾以邾子訛邾人經知
貢舉與監試諸官題參考試官亦自檢舉請將試錄改正因將同

考官范廷魁孫承恩議處在案此人人共知者已亥至今相隔只
一科不宜遺忘而羅繼謨者又已亥春秋房中式士也以已中式
之題而擬以試士既屬可怪況已經訛錯之題而重爲訛錯在前
此之誤猶因坊本相沿偶失檢點故范孫之參罰可從輕擬今已
經更正 敕改試錄煌煌然載於功令而乃以是科中式之人題
卽是題錯復再錯是前爲過誤今且怙終前因違經今復悖 敕
此其所繫匪細故也然且前時舉子哄堂而爭則內簾受過凡題
寫邪子者概使錄入今之諸生亦哄堂而爭而內簾反不受過凡
題寫邪子者皆貼斥不錄違經士子轉受黜落去取盡乖屈抑誰
贖毋怪乎叩闕者之嘵嘵矣疏上奉

旨從重處分

陳琬曠園雜志云康熙己酉鄉試山陰袁顯襄以開題問乩批云

不可語再叩曰豈終無一言耶批曰題目卽在不可語上又乞明
示批一署字及入闈乃知之者一章題有四者字且在中人以上
一章用不可語之句也袁晤遂中式 按余德水 金熙朝新語以
此爲所夢于忠肅祠事

法時帆樁門詩話云襄城劉太乙先生青藜康熙丙戌翰林鄉舉
前一年夢人持一簡題云太吳陵邊思故鄉兒女織錦千丈長那
解刀尺作衣裳謂先生曰此明年科場題也先生熟思久之曰其
子在陳章平已而果然乃爲詩以紀焉

藤陰雜記云范浣浦 咸雍正癸卯聯捷入翰林先是夢得泥金賀
帖有齊第五三字鄉試首題爲子華使於齊一節會試首題爲道
之以德一節第五字皆齊字也

紀文達師灤陽消夏錄云乾隆壬申鄉試一南士齋沐禱於關廟

乞示試題得籤云陰裏相看怪爾曹舟中敵國笑中刀簪籬剖破
渾無事一種天生惜羽毛是科孟子題爲交聞文王三句應首句
也論語題爲夫子莞爾而笑曰割雞焉用牛刀應第二句也中庸
題爲故天之生物必因其材而篤焉應第四句也是真不可測矣
嘉慶丁卯浙江鄉試有人以闡題叩仙仙者批云內一大外一大
解元文章四百字及出題乃天何言哉三句一大者天也內外者
題內題外也四百字者明指四時行百物生也隱語亦可謂巧矣
又某科有以闡題問仙者批云不知問旣爲仙仙那得不知又
批云不知問旣問仙仙終求告我又批云不知及出題乃不知命
全章也

熙朝新語云總憲金公

德瑛

視學江西考吉安府童生五鼓點名

畢燈下見紅衣婦人從考棚趨出冉冉騰空而去問之僕隸皆見

公心惡之卽以中庸必有妖孽四字命題正午諸生方握管構思忽考棚傾倒壓死三十六人金公據實奏聞

上憐之俱賜作生員 按于光華惺筆錄中亦載此事云金公點

名時見有人持一牌上寫一題云天之將喪斯文也公心惡之卽以天之未喪斯文也命題及正午大雨如注震雷一聲考棚傾倒壓斃三十六人與前所載小異

秋竹齋隨筆云康熙庚子科晏斯盛發解馮詠第二馮於未入場先請乩問今科是何題乩判云首題好似主考樣二題不在四書上三題爾曉得也好爾不曉得也好初不能解是科兩主考乃李之望鄂爾奇首題禮云禮云玉帛云乎哉樂云樂云鐘鼓云乎哉蓋禮樂與李鄂音相似故云好似主考樣也次題在彼無惡四句乃詩詞故云不在四書上三題人知之亦囂囂人不知亦囂囂卽

所謂爾曉得也好爾不曉得也好神語影射之妙如此又廣昌何人龍發解未放榜前人問此仙解元是何姓名此筆判云欲知解元是何人龍虎榜頭仔細尋則何人龍三字固明明說出矣不謂之仙筆不可也 按何人龍爲康熙辛卯科江西省元

戴服塘石鼓齋雜錄云雍正丙午查嗣庭俞鴻圖典江西試查爲主考以君子不以言舉人二句及山徑之蹊閒一節命題其時方行保舉或劾其有意譏刺茅塞子心更不知何所指因搜其筆札詩草語多悖逆遂伏誅並兄慎行嗣璵遭戍有差因停浙人丁未會試俞鴻圖以副考官自辨係出口省月試題得免罪旋出學差以不知檢束亦論死

又云乾隆壬申胡蛟齡徐堂典山東試以民之於仁也甚於水火及山徑之蹊閒一節命題旣而念下文有蹈而死字面怏怏不樂

胡因是成心疾回京憶巡城時有聽情求賕事卽自行檢舉逮訊以風憲官加等論罪瘐死獄中徐田大考四等改知縣嗣是相戒不用山徑之蹊閒題而山東戊申復以君子不以言舉人句試士豈未之聞耶

湯大奎炙硯瑣談云某科會試場前同人請此問題先以四書第一題請此批云中人以上章問次題又批云中人以上章問三題亦如之後首題爲知之者一節次題爲故天之生物必因其材而篤焉見中人章外註三題爲五穀者一節見知之者章外註亦可謂奇而巧

書香堂筆記云聞乾隆初長樂有江震者八股文最著又能頃刻成篇值學使歲考江到已在扃門之後乃搥門求進學使聞其名開門納之諭曰汝到遲已有罪須多做數藝以自贖乃當堂另揮

題紙與之云一至一二至二三聖人四孔子通場皆爲茫然江揮
筆知飛自午至未四篇已就首題爲一朝而獲十禽至終日不獲
一次題爲二者皆法堯舜至道二三題爲聞君行聖人之政三句
四題爲陽貨欲見孔子四句學使奇賞之而名益噪矣

王槭秋燈叢話云海甯陳孝廉遇堯乾隆壬申 恩科赴禮闈夢
二友造訪乃浙江壬子及江南甲子兩孝廉也方欣然道故忽喧
傳寇至陳倉卒欲踰垣而走甫舉足卽騰身霄漢閒而墜失一履
忽悟友故已久何至此叱之而醒以告同人咸不解而陳每疑爲
不祥場事甫畢董曲江聞其事謂人曰陳子捷矣或詰之云今科
首題君子有三畏節卽浙江壬子鄉試所已出者次題果能此道
矣節又與江南同題聞寇失履非三題業屢弗得之意耶至驚
雲路當爲飛鸞之兆但與泉下人相周旋恐享年不永耳榜發果

雋不踰歲竟赴玉樓之約

槐廳載筆云乾隆甲寅、恩科綿竹鄒生某入闈與同邑黃生多益同號鄒至黃號閒談忽見號板上寫樂道人之善二句題鄒問何爲寫此黃曰今科題也鄒曰何以知之黃曰余初應童子試卽夢四川甲寅題係此余得中元心疑甲寅非鄉試之年何以有科醒後因取多益二字爲名以俟後驗今甲寅果有科題亦當不差也汝何不早爲揣摩耶鄒笑曰君一夢尙未醒耶略不介意及題紙下果出前題榜發黃果中元

英煦齋師恩福堂筆記云人言直省鄉試不宜出大學題出則闈中必有火災吳健菴先生於嘉慶戊午典廣東試事題爲此之謂絜矩之道是科騰錄所遭回祿趙鹿泉先生戊申試江西出十目所視二句至爲文祭告乃發刻是科竟爾無恙此又何理耶

又云和於嘉慶辛酉典試江南已事回京

上諭曰江南試題首爲卑宮室而盡力乎溝洫是紀本年直隸水患孟子題放勳曰至如此與順天題同汝應出有末句卽此可見同心同德

睿廟披閱章奏過目不忘如此惟有叩頭感服而已

繆蓮仙曰彭文勤公視學浙省時試題多觸景生情機趣橫溢乾隆戊戌冬案臨處州初場府尊不到委同知點名至次場來謁公曰太尊今日纔來對曰方從省垣歸前不獲已故委同知來公曰來與不來應聽太尊自便但尙有童生正場太尊能來益昭慎重耳曰敢不如命是日七學出題自一字至七字止一日來二日醫來三日遠者來四日送往迎來五日厚往而薄來六日不遠千里而來七日而未嘗有顯者來經題易爲七日來復書爲鳳凰來儀

詩爲貽我來牟春秋爲邾子來朝禮爲禮聞來學以是日間答中
多來字故也及試童生聞郡中適有重案遂以五刑命題一爲以
杖二爲其徒三爲若流四爲則絞五爲而斬再次場而府尊又奉
檄進省仍委同知點名公笑謂教職曰太尊今日又不獲來矣出
題一爲又其次也二爲委而去之三爲同其好惡四爲知其所止
五爲來者不拒合之爲又委同知來五字也及次年科試其地點
名畢所留監場教職有二人稟今日某鄉宦治喪卑職與有舊不
能不往公笑而許之俄頃出題一爲伯牛有疾二爲康子饋藥三
爲子路請禱四爲充虞路問五爲右師往弔覆試日有一文生二
武生補考文題且一人之身武題夫二子之勇追試金華九九學
同場將命題一教職偶稟他事語雜仲四先生公問仲四何人曰
武義歲貢設帳郡齋者遂連書九題一爲武王是也二爲義然後

取三爲歲不我與四爲進不隱賢五爲士志於道六爲仲尼之徒
七爲四體不勤八爲先行其言九爲生之者衆合之爲武義歲進
士仲四先生九字也童生初場題亦分出四仲字一爲微仲二爲
虞仲三爲管仲四爲牧仲及次場各教職耳語曰今日恐不能再
切仲四矣公微聞之卽書四題一爲太王二爲尊賢三爲西子四
爲席也仍補足前日設帳邵齊之語覆試總題則仲王四年也後
仲四間之謂太守曰宗師前後試題勝於爲我作傳也

又云保定某令係翰林改授者邑試出雖有鏹基題鏹作滋童生
有點者詣案前問曰滋基是何物令曰田器收不讀註耶童曰田
器亦不一此莫非桔槔乎曰旣從金旁當是錢鏹之屬繼覺其言
有異取視題牌果寫水旁乃笑曰本縣一時筆誤幸有爾詰問業
已說明金旁否則成笑柄矣遂改正焉江蘇某宗師歲試某府題

爲昔者竊聞之一節失寫予張諸生譁然教官慰之云此書吏遺
寫之過衆以目擊宗師手書如何誘諸書吏一士戲占曰祭酒聲
名久播揚四書語句頓遺忘想因文學推游夏失卻堂堂一子張
又浙江某宗師歲試杭州題出禮大夫有賜於士三句諸生疑而
未決有云大夫三句是禮文非引禮爲說若將禮字截斷則上而
惡無三字不成文也抑另有別解耶時宗師見有出號紛紛耳語
者急取四書閱之見硃點於禮字旁略高書吏因之誤寫過硃時
未經詳審耳因就題脾用硃筆圈去禮字又近時浙江鄉試二場
易經題有出離爲日爲電五字者與某科第一場首題利與命與
仁恰好成對

學使者出題之巧莫過於彭文勤公在江南時科試七屬題爲歲
辛丑二月再來每屬一字蓋年月恰值副此巧思一時傳爲佳話

又考某屬親書三個洋洋乎付監場教官傳云一係鬼神之爲德章一係大哉聖人之道章一係關雎之亂章教官稟稱今日試四屬尙少一題公笑曰少則洋洋焉因補書之其敏給如此又相傳公在浙江時歲試金華四屬老生府學題爲今有受人之牛羊而爲之牧之者金華題爲今有同室之人鬪者蘭溪題爲今有人日攘其鄰之雞者東陽題爲今有禦人於國門之外者值此四學諸生不馴公於考之次日罰令向文廟拔除宿草諸生作詩揭於通衢云府學牧牛羊金華閭一場蘭溪猶小竊大盜起東陽公聞急釋之

鮑雙梧侍郎

桂星

督學中州出題過於割裂士子嘖有煩言有刻

薄子至逐題作詩嘲之盛傳於時按邱瓊山大學衍義補云國初時所試題目皆摘取經書中大道理大制度關係人倫治道者然

後出以爲題當時題目無甚多故士子專用心於其大且要者又得以其餘力旁及他經及諸子史主司亦易於考校非三場勻稱者不取近年以來典文者設心欲窘舉子以所不知用顯已能其初場出經書題往往深求隱僻強截句讀破碎經文於所不當連而連不當斷而斷遂使學者無所依據施功於所不必施之地顧其綱領體要處反忽略焉以此科場題目數倍於前學者竭精神窮日力有所不能給故於第三場策問所謂古今制度前代治蹟當世要務有不暇致力焉者甚至名登前列亦或有不知史冊名目朝代前後字書偏旁者第以科額有定數不得不取以足之然此又不但科試爲然而提學憲臣之小試所至出題尤爲瑣碎用是經書題目愈多學者資稟有限工夫不能徧及此實學所以幾廢而科舉所得罕博古通今之士也據此則前明風氣卽已如是

性雙悟係通儒不應作此狡獪雖謔至傷虐亦自貽伊戚也茲節錄其詩以示戒焉顧鴻云禮賢全不在胸中扭轉頭來只看鴻一目如何能四顧本來孟子說難通驅虎云世間何物最爲兇第一傷人是大蟲能使當先驅得去其餘慢慢設牢籠及其廣大草云廣大何容一物膠滿腸文字亂蓬茅生童拍手呵呵笑渠是魚包變草包見牛云屠刀放下可齊休只是當年但見牛莫謂龐然成大物看他殼觶覺生愁侍郎又字覺生也禮云玉云禮云再說亦徒然實在須將寶物先匹帛有無何足道算來不值幾文錢十尺湯云古來慘刻算殷商炮烙非刑事可傷不見周文身一丈也教落去試油湯七十里子云沒頭沒腳信難題七十提封一望迷阿伯不知何處去賸將一子獨孤悽穀與魚云秋成到處穀盈堆又見魚人撒網回不是池中無別物恐防現出本身來下襲水云真

成一片白茫茫無土水於何處藏侮聖人言何道理要他跌落海中央寶珠云揀取明珠玉任沈依然一半是貪心旁人不曉題何處多向紅樓夢裏尋

莆田林帖瞻

楊祖

爲道光乙酉科吾閩解元自言是年春開夢其

舅氏翁某招其陪主考飲渠辭以應試諸生不宜先與考官來往翁某笑曰汝已不在中列侍飲何妨帖瞻詰其故翁某曰今科首題是說禮汝文中川嘉會二字已遭抹矣次題係說生知學知三題係說學校詩題係說春草帖瞻笑曰秋闈何以出春草題必無是事既是科首題爲上好禮則民易使也次三題並不合詩題乃春草秋更綠帖瞻驚異乃記前夢不用嘉會字竟領解至己丑會試次題爲或生而知之兩句三題爲夏曰校三句詩題爲春色先從草際歸遂於是科成進士前後夢兆巧合如此而又錯互其說

殊不可解按王漁洋香祖筆記云順治八年辛卯予年十八一日讀書倦而假寐夢神人告曰汝知今科闈中題乎乃子曰惟仁者能好人能惡人也詩經題乃維清緝熙文王之典叩其餘則不應及入闈首題果符所夢頌題則聖敬日躋及明年壬辰會試頌題乃維清緝熙二句予中是科鄉試第二施改第六壬辰下第而先兄吏部登進士神所告乃予兄弟鄉會試首尾二題也此亦夢兆巧合而復前後錯互與帖瞻事頗相似

顏崇槩樂圃閒述云順天萬維嶽嵩自謂平生與復聖有緣其入學題乃夫子循循然善誘人食餼則博我以文約我以禮丁酉領解則顏淵喟然歎章明年

御試題則克己復禮爲仁惟庚戌會試三題皆非顏子事及揭曉得雋本房師乃先考功亦非偶然矣按考功名光敏字修來爲

復聖裔孫

懷秋集云壽州葉甲丁酉中式第七後緣事改名澹入學補廩康熙戊午金陵鄉試語同寓休甯戴錫蕃曰吾夢場中首題是點爾何如一節並囑其從游王宅三王鑑各作一藝戴以舊題熟擬未必出置之是科首題抑爲之不厭三句夢弗驗也越三年辛酉二王復科舉戴又與同寓因問其師葉則去年七月作古矣是科首題果點爾何如一節出場時二王相告以爲異是科戴中副車五山志林云簡公天章中式康熙辛丑進士揭榜日忽黃沙蔽日辟易人馬

上諭恐所中者或有未公令加覆試黜退者十六人簡公與焉未幾所黜者仍次第捷去天章再中雍正庚戌科進士而辛丑論語題爲據於德三句孟子題爲自生民以來二句庚戌論語題爲志

於道三句孟子題則子貢曰見其禮全節題目遙遙相合豈非有定數存乎

顧復初

棟高

震滄集云無錫蔣遵路

國初諸生病耳聾一日就

試題爲吾學殷禮句同號生誤認作論語遵路乃朗誦有宋存焉其人致謝而猶誦不已學使者遂攝二人俱罰令跽遵路曰此無與鄰號生事乃某文得意不禁高聲耳學使者閱其草稿大聲曰做完後領責及案出遵路竟冠其軍

吳蘭雪

嵩梁

曰李小松侍郎

鈞簡

督學江右時出題最爲工巧幾

與彭文勤公齊名嘗按試吉安兩縣首題一爲富之一爲器之次題一爲使有菽粟如水火一爲猶以杞柳爲桮棬一氣相生亦天然對仗也

黃霽青

安博

曰乾隆閒會試鄉試題多用搭截及小題蓋避士子

揣摩熟題也庚子會試首題則衆物之表裏精粗無不到一句則出朱子所補格物章余同邑范刺史寶琮入闈之夕於號舍中夢其父告曰汝欲中式題目須不在四子語中醒而異之題紙下始恍然文思泉湧遂成進士乙酉順天鄉試首題孰謂微生高直或乞醯焉二句題中暗藏乙酉二字則又天縱聰明非几近所能窺測矣

薩香三廷浦曰吾鄉鄭某少孤其母知書督課甚嚴一日某出塾晚歸失所抱書懼歸受責徬徨路歧其母尋之久見其狀訶詰之某以實對怒拾道旁樹枝將加笞焉某走避茄亭中一破衲僧白髮垂耳方席地結跏坐母踵至倉卒閒問和尚見所遺書耶僧微笑曰方外人不考文焉知子日書云不過知之爲知之不知爲不知是知也母默而小立復手捧某某環僧而跳僧叱曰而戲拋所

業慈訓又安逃耶某且走且罵賊禿何與人事母恚甚口語必死此忤逆兒僧搖手止之遙指亭樹極開此非渠書乎母往取良是某戟手罵曰此必賊禿所藏母批頰酬謝僧語之曰夫人自是賢明顧郎君惡口出乎爾者反乎爾也他日恐終以此爲清門之累可善教之毋忘老僧言也母喝子禮拜出亭行數武僧已無蹤影矣心異而識其語後某入泮首題爲子曰書云四字次則不考文三字以出乎爾者二句補廩以知之爲知之三句中鄉舉大桃得河南某縣令因聽訟怒詈諸生致責笞獲譴僧言悉驗亦異矣黃霽青曰永安南嶺爲文丞相駐師處有丞相祠堂前明萬厯間溫君太和爲諸生時清明上冢南嶺醉臥溪邊夢二鬼昇之下水忽見朝衣冠人訶二鬼曰此天秩天敘人綱人紀舉子也鬼遽舍之去恍然而寤後於萬厯壬子科入闈題爲故君子名之必可言

也二句中股卽用天秩天敘人綱人紀分柱中式因感神相之陰祐遂於其地建祠至今香火甚盛

浙中歲試歷任皆先考甯波義取安甯以諺有下馬考杭州不死便丁憂語有宗師某案臨獨先取齊首郡前一日懸牌云首題出論語次題出孟子及試日封門後竟與教官閒談交已牌諸生上堂稟請出題曰昨日牌示矣衆有知有不知知者會意退不知者教官代諭各歸號去有一生獨留曰敢問次題是萬章節否某曰孟子中有二出乎生曰語人曰上文豈衍文耶某久之乃曰君子居是邦不非其大夫孟子客卿也以臣非君不可以訓多士生曰孟子在齊爲客卿於梁則賓師襄王慢士非之是也夫謨蓋都君使治狀棲亂倫蔑禮之詞獨可以訓多士歟某語塞勃然色變有教官大聲斥之曰襄王章出與出而哇之皆連下三字讀諸人皆

領會而退爾獨刺刺不休意欲何爲此生氣餒不復置辯而退
國初嘉應州有諸生李文固者善諧謔考試日宗師以古之人古
之人六字命題並未註明何章李乃揖而進曰孟子中有兩處古
之人古之人不知宗師所出者是上句古之人古之人抑是下句
古之人古之人若是上句古之人古之人人生員好做上句古之人
古之人若是下句古之人古之人人生員好做下句古之人古之人
倘是上句古之人古之人做了下句古之人古之人或是下句古
之人古之人做了上句古之人古之人便將宗師所出古之人古
之人題目做錯了敢請數語皆一氣說下聞者無不失笑宗師急
麾之曰任你去做一日又遇考試題是割不正不食李已完卷收
處又添一段云噫予生也晚未能與孔子同時一食其所膳零頭
碎角之肉豈不惜哉宗師閱其文甚佳及見結處不覺爲之噴飯

竟置四等

林蓼懷曰名士出題不復詳審往往傳爲笑柄如劉金門侍郎屬
請督學浙江時牌示兩題一爲男子生一爲女子生諸生爲之譁
然又那繹堂祭酒彥成成均課題手書十目之所視十手之所指
一句六堂幾至罷課劉與那皆宿學徒以輕率遂成巨謬可不慎
哉

茹古香尙書蔡編次吟花課藝所列題目皆工儷可喜今節錄如
左云色難才難亦足以發未之能行人僧三軍管仲之器冉求之
藝參乎吾道回也其心子謂南容子見南子乘桴自牖東帶拖紳
三仕三黜屏氣曲肱我欲仁子欲善短有袂長一身非帷裳非祭
肉必有明衣必有寢衣割不正席不正不語寢不拜寢如用之雖
得之一日克已三年有成夫子之說夫子之云子路率爾而對曰

夫子莞爾而笑曰齊景公問政於孔子孔子術靈公問陳於孔子
孔子奚其正子曰野哉淺則揭子曰果哉陽貨欲見孔子孔子孺
悲欲見孔子孔子孔子行齊人孔子行趙狂非敢後也馬質猶文
也虎伯夷叔齊齊惡章伯夷叔齊齊君章伯夷叔齊齊景公章伯夷叔齊齊民章
章與仁若聖章與仁字言章明日衛靈章明日子路章夏之門人問交子章
夏之門人子游章子曰舜大孝章子曰舜大孝章七八月之間梁襄王章七八
月之間原泉章有人於此彭更章有人於此存心章有人於此小弁章有人
於此曹交章六七作十一征無違夫子訓其良人二嫂二女其三人
共一入堂高數仞食前方丈小人學射於尹公之他尹公之他先
生以利說秦楚之王秦楚之王

制義叢話卷之二十二

制義叢話卷之二十三

福州梁章鉅撰

顧亭林曰制義發端二句謂之破題大抵對句爲此宋人相傳之格下申其意作四五句謂之承題然後提出聖賢爲飾而發此言謂之原起至萬厯中破止二句承止三句不用原起篇末敷演聖賢言畢自陳所見或數十字或百餘字謂之大結後功令益密恐有藉以自衛者則但許言前代不及本朝至有大結止用三四句者矣

又曰坊刻有僞作羅倫致知在格物一篇其破題曰良知者廓於學者也按羅文毅中成化二年進士當時士無異學使果有此文則良知之說始於彝正不始於伯安矣況前人作破亦無此體以其爲先朝名臣而借之耳按俞長城百二十名家中尙載此文

趙甌北翼 陔餘叢考云破題不始於八股李肇國史補載李程日
五色賦旣出闡揚於陟見其破題云德動天鑒祥開日華許以必
擢狀元是唐人於作賦起處已曰破題又劉貢父詩話載閩土作
清明象天賦破題云天道如何仰之彌高又螢雪雜苑載俞陶作
天之歷數在舜躬賦破題云神聖相授天人會同何謳歌不之堯
子蓋歷數在於舜躬陳元裕主文衡出大椿八千歲爲春秋賦題
滿場破題皆閣筆遂自作云物數有極椿齡獨長以歲歷八千之
久成春秋二序之常蔡曼卿作君人成天地之化賦破題云物產
於地形鍾於天賴君人之有作成化工之未全陳尹作漢文帝前
席賈生賦破題云漢文好問賈生力陳忘其勢而前席重所言之
過人陳季陸出皇極統三德與五事賦題魁者破題云極有所會
理無或遺統三德與五事貫一串與百爲張亢門客作坤厚載物

賦或誦其破題於亢曰粵有大德其名曰坤亢應曰續兩句可贈和尙曰非講經之座主乃傳法之沙門又范蜀公賦長嘯卻敵騎破題云制動以靜善勝不爭宋景文破題云月滿邊塞人登戍樓是皆賦之破題也詩亦有破題六一詩話謂梅聖俞河豚詩開首春洲生荻芽春岸飛楊花只此破題已道盡河豚好處蟹雪雜說載湯黃中試秋燕已如客詩破題云近人方賀廈如客已驚秋石林詩話亦謂賈賓王靈隱寺詩惟破題驚嶺鬱岩堯龍宮隱寂寥是宋之間所作下皆賓王作此又詩之破題也夷堅志載程覺改習易經謁老儒張師韓傳易義張敦以預擬題目如聖人作萬物觀之類仍教以破題及主意於是遂捷此則經義之破題也科場舊例載順治二年定初場破題禁用七也七焉七矣承題禁用七夫七蓋七甚矣七乎七歟起講禁用七意謂七若曰七以爲

小結禁用七蓋大結禁用七大抵七抑七嗟夫之類又載乾隆四十二年奉

上諭昨檢閱內廷舊存摺奏內有康熙五十六年詹事王奕清密奏於考官入闈後卽諭謄錄官凡七藝中破承開講等處字概不謄寫以防關節等語

上曰王奕清所奏自屬防弊之法但將破承起講等字概不謄寫於文埤旣不明順且篇幅不完體制尤多未協朕思與其暗防弊竇不若明示章程嗣後令順天及各省主考官於刊發題目時卽酌定三篇內承題起講應用虛字明白開列另行刊印一紙分給舉子如此科首篇承題用夫字次篇用蓋字三篇用甚矣起講首篇用今夫次篇用且夫三篇用嘗思之類下科卽將此等虛字錯綜更換總聽主考臨時酌定俾通場一體遵用違者貼出如此於

不齊之中寓以齊則雖欲暗藏關節應無所施其伎倆而以主考
官酌定不出房官之手則士子無從摹擬不致別生弊竇於防弊
更爲周密會試亦著照此例行並刊入科場條例至嘉慶四年復
奉

上諭云鄉會試頭場文字承題小講限用夫蓋甚矣及今夫且夫
嘗思等字亦皆起自近年其實此等虛字卽不限用亦屬無關弊
竇真正關節原不在此此例非著停止欽此大哉

王言頌聲匝於庠序矣

梁素治學文第一傳云凡作破題最要扼題之旨肖題之神期於
渾括清醒精確不移其法不可侵上不可犯下不可漏題不可罵
題語涉上文謂之侵上語犯下文謂之犯下將本題意思未經破
全或有遺漏謂之漏題將本題字眼全然寫出不能渾融是謂罵

題其兩句之中有明破暗破明破者就本題字明明破出如孝弟字卽還他孝弟道德字卽還他道德是也暗破者將題目字暗暗點換如孝弟類以倫字代之如道德類以理字代之是也有順破逆破順破者照題目字自上而下如學而時習之先破學次破時習是也逆破者將題目字自下而上如其爲人也孝弟先破孝弟次破爲人是也有正破反破正破者題之正面以正語破之或反面題或側面題不便措語亦以正意破之俱名正破反破者反題意而破之蓋以我解題之法也又有上句領章旨下句講本題者有上句講本題下句承章旨者有上句講本題下句或推開或吸下或直斷或虛足者有兩句分破題面者有兩句如門扇對峙者如不亦君子乎搭至其爲人也孝弟破云君子爲學之終孝弟爲人之始是也有兩句分用也字立兩字者如問人於他邦題破云交

之不可疎也有因問以通其意有焉此皆常格也至有用三句者則變格也長題之破貴簡括搭題之破貴渾融大題之破貴冠冕小題之破貴靈巧則又須因題而製者也

徐做弦先正文鈔撮要云破題之後爲承題承者接也因破義尙渾融故又將破中緊要字樣承接下來或正破則反承或反破則正承順破則逆承逆破則順承餘以類推總要明快斬截亦不宜使破自破而承自承也

梁素治曰如遇長題不能逐句承出則宜擇關切重大者籠括之承題最忌者平頭並腳平頭者領頭數字與破題領頭數字相同如破題領頭用聖人承題領頭亦用聖人是也並腳者煞尾數字與破題煞尾數字相同如破題煞尾用而已字承題煞尾亦用而已字是也起頭用夫字者承破意而指點之辭也甚矣字者承破

意而懇切言之也破題於聖賢帝王諸人須用代字不可直指其名承題則直言之如堯舜則直稱堯舜孔子則直稱孔子其餘諸人倣此無復避忌也

唐翼修曰承題之理其小節處梁素治言之已詳茲取其大者言之則莫如原題一款明文多於承題之末領承上文此體最爲美善何也未順口氣之前承領上文則上文在上本題在下體裁順矣旣順口氣而始領上文則本題在上上文在下義理倒矣苟布置得宜猶或不背於義布置一失其宜則體裁乖舛甚矣故成宏以前之文多於承末原題者爲此故也今將其式附後 王鏊見賢焉然後用之承題云甚矣知人之難也不親見其賢而遂用之豈能慎之至哉昔孟子告齊王進賢如不得已之意及此 唐順之匹夫而有天下者二節承題云蓋聖人之有天下不獨以其德

亦以天子之薦與繼世之不賢耳不然其如德何哉此孟子感舉羣聖之事以證禹之非德衰也 茅坤何哉君所爲輕身至君無見焉承題云夫君之欲就見賢者固其好善而忘勢而魯臣卒沮之豈非吾道之將廢也歟此臧倉所爲譏孟子於魯平公而爲之言也 王守仁喜怒哀樂至謂之和承題云蓋情之未發性也故謂之中發而不失其性情之正也故謂之和中庸明道不可離之意如此其旨深矣 熊伯龍管氏亦有反站承題云夫反站何物而管氏亦有之也哉則其比於僭也又不獨一塞門矣 李東陽有德此有人四句承題云蓋德者平天下之本也平天下者而有德焉則凡天下之利有不期而自至者矣大學傳治國平天下而論及君子之先慎乎德 蕭鳳鳴唐虞之際二句承題云夫得人之盛自古爲難也非唐虞迭興之時豈復有盛於周哉昔夫子論

周室人才之盛而有憾於人才之難 許道中畜馬乘至聚斂之
臣承題云夫家雖不同而食君之祿則同畜雞豚牛羊與畜聚斂
之臣不一而以利爲利則一欲盡治平之道者可不以是爲戒哉
昔曾子引孟獻子之言如此 徐常吉一戎衣而有天下承題云
夫天下非小物也一戎衣而有之是何其取之之易哉於此見武
王之能繼緒也已 以上皆承末原題式也或曰似此承末原題
與今時大不相類安可施之今日余曰前輩起講過於簡短則不
宜學承題長而條暢何必不學況於三四句之下卽原題亦不嫌
其過長也

孟瓶菴師曰前明何仲默

景明

少能文見者疑之以梁惠王章句

士六字命破題卽應聲曰以一國僭竊之圭冠七篇仁義之書又
有浙江陳木叔

煥

者作入云則入坐云則坐食云則食三句破題

云三命滋益恭二簋可用享用二成語皆切當

鄭蘇年師曰金正希初應童試題爲豈不日以位終日構思不能成篇時交卷者將盡學使令人察其卷止成一破題將扶出矣取破題閱之則云君所挾以傲士者固上所籌及者也大加擊賞給燭令終篇遂入泮

閻百詩曰金正希七歲隨父商嘉魚父爲諸生所訟將受責泣曰有一子頗能文願以此自免令異其言召正希試以學而第一爲政第二爲題卽作破曰學而後爲政未聞以政學者也令大驚曰子他日必以文章名世豈終爲商人之子哉按嘉魚令爲滇人葛中選亦奇人當時卽招金入署教之其兵法禪學皆傳自葛也聞陳大士少時讀書作文卽高視闊步不讀朱子集注初應童試題爲君子易事而難說全節構思竟日不完卷而出其友詰之則

曰我只得一破題甚得意自謂他手所不能竟至以下不能再著一語其友曰試述之大士曰君子之心公而恕小人之心私而刻友笑曰此集注語若何掩爲已有耶大士爽然自失自是始讀朱注余按陳大士賜也爾愛其羊一節文中比陳寶赤刀所爲珍秘剝果蒙泉所爲發生兩意於實理虛神推闡曲盡卻只是就注中猶得以識之而可復焉兩語分晰出來然則大士乃深於集注者矣

明良記云李尙書昊以省元入監時邱瓊山爲大司成李自通曰浙江解元李昊見邱公怒其淺陋令卽用其語作一破題李應聲曰以一省之名元謁天下之宗主邱公曰虛譽雖隆而實德則病者此人之謂也

堅柳集云平涼趙公時春年九歲應童子試文佳甚學使者疑其

代作面試之以子曰二字命題公應聲曰匹夫而爲百世師一言而爲天下法復命自賦其姓名公亦應聲曰姓冠百家之肯名居四序之先又商邱安世鳳衝太守前導守指路旁此屋出賣四字合作破題安應聲曰曠安宅而弗居求善價而沽諸又雲閒莫如忠六歲應試主司訝其小而面試一破以爲政入俗里仁公治長爲題莫應聲曰化隆於上而有僭非其禮者俗美於下而有犯非其罪者主司歎賞遂入泮

又云成化丙戌陳公甫

憲章

莊孔暘

景

章德懋

懋

應試南宮主試

者相戒曰場中有此三人不可草率及填榜章莊高列獨不見陳卷亟覓之題爲老者安之三句陳破云人各有其等聖人等其等同考者業此其旁云若要中進士還須等一等見者哄堂又南直宗師歲考某縣諸生題爲斯民也三代之所以直道而行也一生

文中有一代一代又一代句宗師批云二等二等再二等遂寘之六等云

遺愁集云明時一友才甚高或戲曰君能作四五字破否乃以君命召二句爲題應曰王請度之一座稱善或云能復作一字破乎適見一髯髯過卽指爲題應曰擲衆不解友曰皮去毛者也相與絕倒

又云有一業醫而仍應童試者學使素識其人題爲人而無信兩句醫者成一破云聖人以厚樸防風人生當歸於信矣學使爲之解頤

繆蓮仙曰湖北某宗師考某郡見一白髮老童問其年七十矣問曾考幾次則以初次觀場對宗師怪而問其詳對曰考者考真才實學耳必摩厲以須功夫做到極盡處出而問世方於國計民生

有賴若稍稍涉獵讀幾篇爛時文輒逐隊應試卽能倖得一科第
究與學問經濟何補某惟忘食忘寢以期此心之無愧而不覺老
之將至矣宗師笑曰然則試作一破題果佳請入場否則仍不得
與考也因取四子書各首句併作一題曰大學之道天命之謂性
學而時習之孟子見梁惠王老童卽應聲曰道本乎天家修而庭
獻也宗師首肯者再曰請入學

鄭芸汀曰有自矜能以減字爲破題者作魯人獵較孔子亦獵較
破云魯俗類聖人雷或曰此未免太簡促能作一充暢破題否因
以雖使五尺之童適市莫之或欺爲題其人應聲曰以最易欺之
人而適最易欺之地而卒莫之或欺者此以見天理之常存而人
心之不死也又有作禦人以口給二句長短破云聖人憎禦人之
人惡其以善爲惡以惡爲善以是爲非以非爲是以賢爲不肖以

不肖爲賢者也承云夫口給適取人憎耳屢憎矣何禦爲
前明宏治中一直指觀風泰州題爲非帷裳必殺之一生破云服
有違乎王制者王法所必誅也直指首錄之云異日必登八座拆
卷乃沈鳳岡後果厯官部院又豫章丁此呂歲試題爲征商自此
賤丈夫始突破云以臣伐君武王非聖人也遂入劣等其後卒成
進士

陳眉公

繼儒

見聞錄云方司徒公純以竿牘通者慨峻卻之或有

獻者曰此書一帙耳公曰余自八仕所習惟一大明律耳何暇讀
他書先爲華亭令考童生先期語人我須出一極長題各童生皆
私閱長題文旣乃今交九尺四寸以長也陸平翁考第二破題云
時人自名其名而自形其形也公極賞之

林暢園師曰康熙乙卯科浙江解元陳介眉

錫嶺

本名下士司文

柄者必欲以第一人處之因於闌前預授關節令於破題中安一
匡天下四字及題紙出則子謂子產一節也榜發陳果領解其元
墨破題云學可匡時思一人以風天下也有臺諫聞其事遽列彈
章

上以其文藝本工不之究而物議亦息 按此篇拈出學字實具
識力其結尾云人謂子產才足稱也子謂子產學有獲也使爲大
臣而不學求一事之幾於道豈可得乎大言炎炎豈得僅以制藝
目之乎

余友鄭六亭廣文積學工文嘉慶戊午余同年莫寶齋侍郎典閩
試六亭自京中回以六月杪到福州六亭與寶齋本相善蓋同在
成均肄業時稱莫逆交遂有喧傳其已通關節者學使者陳春滋
先生錄遺竟扣其卷不送初八日下午始爲監臨汪稼門中丞呼

令入闈遂領解首題爲唐虞之際四字六亭破云才兼二代聖人
鄭重於其際焉多事者以爲隱藏其姓名鄭兼才三字將訐之有
司以素有文譽得寢其事此與康熙閒陳錫嘏事相類其果涉關
節與否皆無定論恐不足據按前明朱國禎於萬曆戊辰主會試
得一卷甚佳以犯國禎二字棄去陳如岡房一卷亦以如岡如陵
見擯順治會試趙吉士卷已中以文中而不與人以可託句犯房
官于可託名見擯及已酉趙分校山右首題爲先有司三句有吉
士彙征語因用趙名主司疑之趙曰果通關節何以名爲因力爭
得中後其人聯捷去爲文水間調鼎也鄭六亭事亦作是觀可矣
相傳河閒紀文達師少負神童之譽而務泛覽博涉不主故常四
子書讀一過卽棄去應歲試時題爲名之必可言也二句師破題
云君子於其言無所苟而已矣遂寘劣等自是專攻經義逾年竟

領解

乾隆間有新選知府某謝 恩蒙 召見者

上詢其出身對曰由監生捐納 問既是監生會應科舉否對曰
曾經鄉試兩次 問既會鄉試自然能作文字可當而作來對曰
恭請 御題

上曰只要汝作一破題題爲周有八士伯達伯适仲突仲忽叔夜
叔夏季隨朕已成一句曰紀周士而得其七尙欠一句可續之某
隨口對曰皆兄也

上大喜不踰月遂擢監司此玉研農師爲余所述如此當時尙聞
其人姓名今忘之矣

乾隆間有一縣令作時文以古初爲尙邑中揣摩風氣每效爲之
邑試時有童生自命必當首選如保赤子題窮日之力只作一破

題云以子子者子眾子孩民孩子合尙焉邑令聞之大喜令給燭
終卷竟冠其軍

繆蓮仙曰嘗聞諸城劉文清相國其姪在京爲相國買宅久而虛
置人間之則曰吾叔父意所不愜也紀文達爲集四書句作破承
題云曠安宅而弗居敬叔父也甚矣地之相去也千有餘里惡在
其敬叔父也噫爲其爲相歟 又曰吾杭張某好葉子戲生四子
皆有父風其妻故儒家女嘗集孟子句成一破題諷其夫曰子好
游乎夫有所受之也乎字借音俗語闕紙牌謂之游湖子字坐實
講夫讀如字受與授同亦可謂錦心繡口矣

詹太守

學雲

曰喻孝廉世欽爲諸生時應試得截搭題乃是可

人而不如鳥乎詩云穆穆文王隔舍生作承題云夫人不如鳥則
真可恥矣因轉不到下截將此二句再三吟之喻聞而生憎曰恥

矣恥矣如恥之莫若師文王隔舍遂寂然蓋已錄之矣主司閱其
文平庸惟承題爲通場之冠因獲售乃訪喻所居執弟子禮焉
陳厚甫曰有師訓其徒曰作文之法破題要正做承題必須先反
後正然後得勢其徒頗似領會一日師以未有學養子而後嫁者
也命題其徒做承題先反兩句云夫養子而後嫁人之常情也見
者無不匿笑

王蘭陔中丞作閩縣令時因巡夜執一童生面試遇諸塗一句破
題童應聲曰聖人之遇權臣聖人之不幸也王爲失色遂遣之
按鄞縣全祖謙榭山太史祖望之兄也四齡卽通諸經因戲剪紙
傷指感風病篤臨危於几上大書經也死三字而附一破曰聖人
不得有子聖人之不幸也逾日遂卒時止六歲閩童殆襲其語耳
陳桂舫錄曰一學使衡文章率每閱一破題便定去取以下不肯

多闕一字一日以不爲酒因命題有童子窘甚不能落筆旁一叟戲之曰孔子飲酒不過一鍾汝未之聞乎童子卽順口成破題云聖人之於酒一中焉已耳蓋鍾字又誤作中字學使但閱破題以爲用中字立意遽取入庠而其下文理之荒謬則並未寓目也

沈桐威

起鳳

諧鐸云婁東陳岳生築蓮橋別業工甫竣家人譁言

有鬼陳疑其妄移榻居焉至夜見青衿者四輩結隊而來一老者年約五十一四十許其兩人則十八九少年也老者曰昨爲風雨敗興今夕月色甚佳盍拈題一角優劣衆皆諾老者袖中出紙團數枚命少年拈其一展視之則視其所以全章題也四人閉目攢眉搖頭搔首約兩時許老者曰今日文機鈍塞祇得一佳破奈何四十許者曰僕亦與翁相等老者索視其破云視所以而觀所由察所安而人焉廋老者曰首句可謂英雄所見略同特次句尙欠

包括因出已作示衆曰視所以而觀所由察所安而人焉度度四十許者大歎服老者曰作文一道毫釐千里君所以長居五等而僕儼然附四等末者實以題無剩義耳言罷意頗自負而兩少年竟擱筆不能成一字

繆蓮仙曰傳聞某省有小邑赴童子試者僅敷學額故能作一破或一承便可獲售宗師閱是邑卷皆不過至承題而止其中惟一卷於承題後大書且夫二字因批云大有作起講之意遂拔置榜首

林少穆

則徐

曰相傳吾鄉有某巨公將司文柄其知交數輩從之乞關節某公斥之曰一班孫猴子好大膽衆皆未喻其意是科題爲巍巍乎惟天爲大至無能名焉中一人頓悟前語因於破題用大聖齊天四字果八股按譜史中有戲作巍巍乎惟天爲大至

無能名焉破題云齊天大聖極天下之無狀焉蓋同此故實也
徐倣弦曰昔人謂起講爲發凡蓋以全篇之文由此講起而發其
大凡也夫既謂之發凡則宜虛而不宜實宜簡而不宜詳宜開門
見山而不可蒙頭蓋面宜提綱挈領而不可籠侗寬鬆解此以爲
合式則入手便知含蓄養局緊醒擒題以後由淺入深自然井井
不紊可免頭下安頭屋上架屋之病

唐翼脩曰起講有題前寬說法王忌任他日其母殺是鵝題文是
也有題前補襯法章樞山從我於陳蔡者題文是也有就題虛起
法汪茗文或謂寡人勿取題文是也有虛取題神法金正希文每
多有此有開合法有借賓陪主法有借主定賓法有援古證今法
有引經斷事法有推原來應法有故作疑案法錢櫚出一字題文
是也有反題說法瞿季楫父母其順矣乎題文是也有急擒題字

法有講首先虛籠下意後轉入本題法有反挑法王沛陶見其
子焉題文是也有雙起側落法有兩路順襯題情法有兩路反襯
題情法許譽卿如有復我者題文是也有兩路相商折出題情法
程夢蘭如得其情題文是也有巧襯法有暗比題正講法有口氣
題正做法此皆無上文做法也其有上文者有從上文襯入本題
法有卽上文別出本題法俞以除懷諸侯則天下畏之題文是也
有將上文黏合本題法韓元少狂者進取題文是也有將上文陪
講作一家賓主法張爲煥予無樂乎爲君題文是也有暗頂上文
不露字眼法熊次侯四方之政行焉題文是也有講首頂遠脈講
末頂近脈法許虬二一字題文是也有專頂遠脈或專頂近脈卽
借勢點出題面或帶出題字法有單頂上文竟全不及本題法周
鍾湯執中三節題文是也其要則全在安頓上文有法不至令書

義顛倒又須能留餘地不至將題義說完又必不可過長以七八句爲正至長亦不過九十句再長卽是一篇小文非起講矣

梁應來

紹正

秋雨菴隨筆云前明某省某科題爲子在川上曰一

節解元文起講云今夫天地之化往者過來者續無一息之停乃道體之本然也然其可指而易見者莫如川流故夫子於此發之全鈔朱注一字不易不知當時未行朱注耶抑主司忘之耶然以此注作講實屬超妙亦可謂文章本天成妙手偶得之矣

王東澂曰孫狀元辰東原名曙故字扶桑爲諸生時好以駢體爲制義時吳中有文社曰同聲孫爲之領袖同社多效其體風氣爲之一變所選丁亥房書名曰了閑悉六朝麗語風行海內滿洲大臣剛公彈駁文體乃與進士胥廷清繆慧遠史樹駿舉人毛重倬同時被逮扶桑至褫其衿子見了閑首藝爲學而時習之全章起

手云且自芸吹纈古之香杜隕求聲之草桂殘招隱之花以此三句括三節通篇皆類是此篇雖刻他氏實扶桑自作聞卽一起講而構思一日夜云

袁簡齋曰皖江程叔才名忌恭學問博雅註陳檢討四六得名以平時好古不喜時文其師唐赤子太史責之曰科名進身非此不可今歲入場之年汝宜留意因強之誦讀金陳諸大家文程唯唯終非所好四書體註等書臨場並不翻閱康熙戊戌科江南首題舉賢才曰焉知賢才而舉之次題大哉聖人之道程三場畢自言首篇頗得意唐太史讀之喜謂可望魁程偶取案頭中庸一看愕然喪氣喟曰不中用了我只道大哉聖人之道在禮儀三百威儀三千之下故領題出題俱承接此二句今方知是開首第一句則通身犯下矣其不中尙復何言唐亦爲之悼歎已而榜發竟中第

五名唐不解所以得售之故往見主試將探問之主試某故唐公
同年一見笑曰今年科場中有笑話兄知否唐問故曰 朝廷有
密旨謂諸生關節都放在破承領題出題三處今歲將此三處盡
行彌封故有程某文字領題出題全行犯下將來磨勘定受參罰
奈何唐笑而不言後叔才果被吏部磨勘罰停一科